



Ina bela cumpagnia, ils novs veterans d'onur da l'uniun.

FOTOS G. N. STGIER

Er suenter 30 onns be ina incumbensa

Uniun chantunala da veterans da chant

DA GION NUTEGN STGIER / ANR

■ **En rotscha en veteranas e veterans vegnids a la dieta da giubileum a Razén. In dals gratulants è er stà cusseglier guvernativ Martin Jäger. Gion Darms resta per ils proxims trais onns president da l'uniun. 15 chantadurs en vegnids undrads sco veterans d'onur.** Las chantaduras ed ils chantadurs dal Chor mischedau Razén en stads ospitants gentils ed han cun lur bel chant embelli la dieta da dumengia passada. Las chantaduras ed ils chantadurs han testifigà ch'il chant viva er a Razén e che quel tutga en vischnanca tar ina part impurtanta da la vita culturala. Veteranas e veterans en vegnids retschets cordialmain ed han lura er passentà intginas uras en buna cumpagnia. Gist quella stat en il center da la dieta annuala da l'Uniun chantunala da veterans da chant, uschia ch'ils affars statutar en plitost secundars. La dieta è er adina ina buna occasiun per tgirar ils contacts tranter chantaduras e chantadurs da l'entir Grischun che chantan dapi che 25 onns e dapli en in chor. Quai è er l'incumbensa principala da l'uniun e quai er suenter trais decennis. L'interess per la dieta da giubileum, la 30avla, è stà fitg grond cun esser preschents bunamain 200 umens e dunnas.

Chantar fa bain al cor ed a l'olma

Giast dals veterans e veteranas da chant è er stà cusseglier guvernativ Martin Jäger. Il schef dal departament da cultura ha gra-

tulà a l'uniun per il giubileum da 30 onns. El ha er ditg che chantar fetschia bain al cor ed a l'olma. L'armonia da las chanzuns saja ina gultivaziun tar la vita da mintga di, tar la vita professiunala e tar la vita privata. Chantar saja er profund, emoziunal e plaschair, ha ditg Martin Jäger. Sco jodlader activ haja er el ina relaziun tar il chant e cun far quai gia 40 onns tutga er el tar ils veterans da chant.

Be trais preidents

Fundada è l'Uniun chantunala da veterans da chant vegnida ils 14 da december 1985 ed in dals confundatur è er stà Gion Luregn Derungs d'Andiast. El è lura er vegni elegi sco emprim president e suenter 2 onns surdà quel uffizi a Luregn Carigiet da Dardin. Durant 15 onns è quel lura stà in president cun in scharm particular, in um plain umor e cunzunt in parura che ha contribuì fitg bier ch'il dumber dals commembers da l'uniun è s'augmentà permanentain. Tar la dieta da l'uniun il 2012 a Breil è lura Gion Darms da Domat daventà successur da Luregn Carigiet. Dumengia passada a Razén è el vegni confirmà sco president da l'uniun e quai per ils proxims onns. Vinavant en supranza restan er Babina Bonorand, Razén, Roland Capeder, Salouf, Ormar Netzer, Savognin e Guido Ratti, Samedan.

En direcziun 1000 commembers

Gion Darms avess plaschair sche in ubain plirs dals 75 chors grischuns,

ch'appartegnan betg a l'uniun, fashesan in di quel pass per daventar commembers da l'uniun. El saja adina a la tschertga da novs commembers per finalmain cuntanscher il dumber da 1000 delts. Da preschent ha l'uniun 952 commembers che derivan da 71 chors. Il president ha lura er engrazià als parsuras locals dals veterans per lur grond engaschament a favur da l'uniun. Senza quels avess er la supranza da l'uniun nagina funcziun, ha Gion Darms ditg cun in surir.

Chantadurs fidaivels

In punct culminant da la dieta è lura danovamain stada l'onurificaziun dals novs veterans d'onur. Vegnids undrads per lur commembranza da 50 onns e dapli en in chor en 14 chantadurs ed ina chantadura. Dals 15 undrads deriva la gronda part da chors rumantschs. En onur dals 20 veterans e da las tschingt veteranas che han fatg ils davos 12 mais lur davos viadi, quel en l'eternitad, en ils preschents s'auzads, cura ch'il Chor mischedau Razén ha chantà ina chanzun da cumià. In da quels veterans che ha bandunà quest mund è tranter auter er l'antier president da l'uniun, Gion Luregn Derungs. Ad el è vegni sa regurda cun intgins plets cordials davart dal president Gion Darms. La proxima dieta da l'Uniun chantunala da veterans da chant ha lieu a la fin d'avust 2016 en il Partenz e quai a Seewis.



Viva sin ils veterans da chant: (da san.) Guido Ratti, Jolanda Cathomas-Jäger e Romano Plaz.



Trais veterans da chant da Surses: (da san.) Renzo Sonder, René Demarmels e Fluregn Demarmels.



Viva fan er Renatus Balett da Breil ed Otto Cagienard da Trun.



Da buna luna en er quellas chantaduras: (da san.) Erna Schroffer-Waldegg, Anna Helena Cavelti, Tina Steinhauser, Annaghetta Caderas e Giulia Huonder.



Cusseglier guvernativ Martin Jäger flancà dad Alex Huonder (san.) ed Anton Pazeller.



Ina gruppa veterans da chors sursilvans.